



UNDANG-UNDANG MALAYSIA

Akta A376

**AKTA LEMBAGA KEMAJUAN IKAN MALAYSIA
(PINDAAN) 1977**

Tarikh Persetujuan Diraja ... 9hb Mac 1977

Tarikh diterbitkan dalam *Warta* ... 17hb Mac 1977

UNDANG-UNDANG MALAYSIA

Akta A376

AKTA LEMBAGA KEMAJUAN IKAN MALAYSIA (PINDAAN) 1977

Suatu Akta untuk meminda Akta Lembaga Kemajuan Ikan Malaysia 1971.

[Seksyen 2, 3, 4 dan 6:

Malaysia Barat—1hb November 1971

Sarawak—1hb Julai 1973:

Seksyen 5:

Malaysia Barat dan Sarawak—]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

1. (1) Akta ini bolehlah dinamakan Akta Lembaga Kemajuan Ikan Malaysia (Pindaan) 1977 dan hendaklah, tertakluk kepada seksyen-kecil (2), disifatkan sebagai telah mula berkuatkuasa di Malaysia Barat pada 1 haribulan November 1971 dan di Sarawak pada 1 haribulan Julai 1973.

Tajuk ringkas dan mula berkuatkuasa.

(2) Seksyen 5 Akta ini hendaklah mula berkuatkuasa di Malaysia Barat dan di Sarawak pada tarikh yang berikutan dengan tarikh Akta ini disiarkan.

2. (1) Seksyen 2 dalam Akta Lembaga Kemajuan Ikan Malaysia 1971 yang disebut sebagai Akta ibu dalam Akta ini adalah dipinda dengan menggantikan takrif "Timbalan Pengerusi" dengan takrif "Ketua Pengarah" yang berikut—

Pindaan bagi seksyen 2 dan pindaan am.
Akta 49.

"Ketua Pengarah" ertinya Ketua Pengarah Lembaga yang dilantik di bawah seksyen 3 (3);

(2) Akta ibu adalah dipinda dengan menggantikan perkataan-perkataan "Timbalan Pengerusi" di mana-mana jua ianya terdapat dengan perkataan-perkataan "Ketua Pengarah".

Pindaan bagi
seksyen 4.

3. Seksyen 4 Akta ibu adalah dipinda—

- (a) dengan memasukkan perkataan-perkataan “dan bagi maksud itu untuk mengambil bahagian dalam pembinaan bot dan pengeluaran perbekalan dan kelengkapan menangkap ikan” selepas perkataan-perkataan “enterprais-enterprais perikanan” dalam seksyen-kecil (1) (c);
- (b) dengan menggantikan seksyen-kecil (2) (k) dengan yang berikut—
 “(k) dengan kelulusan Menteri dan persetujuan Menteri Kewangan, bagi mengambil bahagian dalam ekuiti, jika yang demikian itu, pada pendapatnya, adalah perlu, berfaedah atau sesuai untuk atau berhubung dengan menjalankan tugas-tugasnya;”;
- (c) dengan menggantikan perkataan-perkataan “pengendalian menangkap ikan” dalam seksyen-kecil (2) (l) dengan perkataan-perkataan “pembinaan bot dan pengendalian menangkap ikan, pengeluaran perbekalan dan kelengkapan menangkap ikan”; dan
- (d) dengan menggantikan seksyen-kecil (3), dengan seksyen-seksyen kecil (3) dan (4) yang berikut—
 “(3) Lembaga boleh, dengan kelulusan Menteri dan persetujuan Menteri Kewangan, dari semasa ke semasa—
 (a) menubuhkan perbadanan-perbadanan di bawah seksyen-kecil ini; dan
 (b) menubuh atau menggalakkan penubuhan atau perluasan syarikat-syarikat di bawah Akta Syarikat 1965,

Akta 125.

dengan apa-apa nama yang difikirkan patut oleh Lembaga, untuk melaksanakan, menjaga, menjalankan dan menguruskan apa-apa projek, skim atau enterprais yang dirancang atau diusahakan oleh Lembaga pada menjalankan tugas-tugasnya dan jika Lembaga berbuat demikian, peruntukan-peruntukan—

- (i) Jadual Kedua kecuali perenggan 4A; dan
- (ii) Akta Syarikat 1965,

hendaklah masing-masing dipakai bagi perbadanan-perbadanan dan syarikat-syarikat itu.

LEMBAGA KEMAJUAN IKAN MALAYSIA (PINDAAN)

5

(4) Sebagai tambahan kepada dan bukan sebagai mengurangkan kuasa-kuasanya di bawah seksyen-kecil (3) Lembaga boleh, dengan kelulusan Menteri dan persetujuan Menteri Kewangan, memohon untuk didaftarkan sebagai suatu syarikat di bawah Akta Syarikat 1965 sesuatu perbadanan yang telah ditubuhkan di bawah seksyen-kecil (3) (a) dan jika Lembaga berbuat demikian—

(a) peruntukan-peruntukan perenggan-perenggan kecil (1) dan (2) sahaja dalam perenggan 4A Jadual Kedua; dan

(b) apabila perbadanan itu didaftarkan sedemikian, peruntukan-peruntukan perenggan-perenggan kecil (3) dan (4) perenggan 4A sahaja dalam Jadual Kedua, dan Akta Syarikat 1965,

hendaklah dipakai bagi perbadanan itu dengan sewajarnya.”

4. Seksyen 6 Akta itu adalah dipinda dengan memasukkan selepas seksyen-kecil (1) seksyen-kecil (1A) yang berikut— Pindaan bagi seksyen 6.

“(1A) Peruntukan-peruntukan seksyen-kecil (1) (a) (v) tidak boleh dipakai jika mana-mana perbadanan yang telah ditubuhkan di bawah seksyen 4 (3) (a) adalah didaftarkan sebagai suatu syarikat menurut seksyen 4 (4).”

5. Akta itu adalah dipinda dengan memasukkan seksyen-seksyen 10A dan 10B yang berikut selepas seksyen 10—

“Tiada seseorang yang ada mempunyai kepentingan boleh dilantik sebagai ahli atau diambil-kerja sebagai pegawai atau penjawat Lembaga.

10A. (1) Tertakluk kepada seksyen-kecil (2), tiada seseorang boleh dilantik sebagai seorang ahli atau diambil-kerja sebagai seorang pegawai atau penjawat Lembaga jika ia ada mempunyai apa-apa kepentingan, secara langsung atau secara tak-langsung dalam—

(a) sesuatu enterprais dalam mana Lembaga telah mengambil atau bercadang hendak mengambil bahagian dalam ekuiti menurut seksyen 4 (2) (k);

(b) sesuatu perbadanan atau syarikat yang ditubuh, digalak, diperluas atau didaftarkan menurut seksyen-seksyen 4 (3) dan 4 (4); atau

(c) sesuatu syarikat atau perusahaan dengan mana Lembaga atau sesuatu enterprais,

Seksyen-seksyen baru 10A dan 10B.

perbadanan atau syarikat yang disebutkan dalam perenggan (a) atau (b) bercadang hendak membuat suatu kontrek atau telah membuat suatu kontrek yang masih berkuatkuasa.

(2) Walau apapun peruntukan-peruntukan seksyen-kecil (1) dan tertakluk kepada seksyen-kecil (3), orang seperti itu boleh dilantik sebagai seorang ahli Lembaga di bawah seksyen 3 (3) (h) tetapi pada melantiknyā sedemikian, Menteri boleh mengenakan apa-apa syarat atau sekatan yang difikirkan patut oleh Menteri.

(3) Sebelum seseorang dilantik sebagai seorang ahli atau diambilkerja sebagai seorang pegawai atau penjawat Lembaga, ia hendaklah menzahirkan dengan sepenuhnya—

(a) kepada Menteri, jika ia akan dilantik sebagai ahli; dan

(b) kepada Lembaga, jika ia akan diambilkerja sebagai seorang pegawai atau penjawat,

apa-apa kepentingan yang disebutkan dalam seksyen-kecil (1), dan apabila ia dilantik atau diambilkerja sedemikian, orang itu tidak boleh memperolehi lagi mana-mana kepentingan itu.

(4) Tertakluk kepada seksyen 10B (1), seseorang ahli yang dilantik atau seseorang pegawai atau penjawat yang diambilkerja berlawanan dengan seksyen-kecil (1), atau yang apabila dilantik atau diambilkerja memperolehi lagi mana-mana kepentingan itu, hendaklah dibatalkan perlantikannya dengan serta-merta oleh Menteri atau pekerjaannya hendaklah ditamatkan oleh Lembaga tanpa notis, mengikut mana yang berkenaan.

(5) Seseorang, ahli, pegawai atau penjawat yang melanggar seksyen ini, seksyen 10B atau sesuatu syarat atau sekatan yang dikenakan di bawah seksyen ini atau di bawah seksyen 10B adalah melakukan suatu kesalahan dan boleh, apabila disabitkan, dikenakan penjara selama tempoh tidak lebih daripada lima tahun atau denda tidak lebih daripada dua puluh lima ribu ringgit atau penjara dan denda kedua-duanya.

(6) Bagi maksud-maksud seksyen ini dan seksyen 10B, pemunyaan atau pemerolehan sesuatu kepentingan itu sebagaimana yang disebutkan dalam seksyen-kecil (1) oleh suamisteri atau mana-mana daripada anak-anaknya hendaklah disifatkan sebagai memberi kepada orang, ahli, pegawai atau penjawat yang berkenaan itu suatu kepentingan taklangsung.

Penzahiran
kepen-
tingan yang
sedia ada.

10B. (1) Tiap-tiap ahli, pegawai atau penjawat yang ada mempunyai apa-apa kepentingan sebagaimana yang disebutkan dalam seksyen 10A (1) boleh, dalam tempoh enam bulan daripada tarikh mula berkuatkuasanya seksyen ini, menzahirkan dengan sepenuhnya kepada Lembaga fakta kepentingan itu dan apakah kepentingan itu yang sebenarnya dan penzahiran itu hendaklah dicatitkan dalam minit Lembaga dan ahli itu tidak boleh pada bila-bila masa mengambil bahagian dalam apa-apa mesyuarat Lembaga berhubung dengan pengusahaan, enterprais, syarikat, perbadanan atau kontrek dalam mana ia ada mempunyai kepentingan itu dan pegawai atau penjawat itu hendaklah berhenti dari menjalankan semua kuasa dan kewajipan berhubung dengannya, tetapi ahli, pegawai atau penjawat itu boleh terus menjadi—

(a) seorang ahli tertakluk kepada apa-apa syarat atau sekatan yang dikenakan oleh Menteri; atau

(b) seorang pegawai atau penjawat tertakluk kepada apa-apa syarat atau sekatan yang dikenakan oleh Lembaga.

(2) Jika ahli yang ada mempunyai kepentingan itu adalah Pengerusi, ia hendaklah berhenti menjadi Pengerusi dan seorang ahli lain hendaklah dipilih untuk menjadi pengerusi dalam masa mesyuarat berhubung dengan pengusahaan, enterprais, syarikat, perbadanan atau kontrek dalam mana ia ada mempunyai kepentingan itu.

(3) Seseorang ahli, pegawai atau penjawat yang melanggar seksyen ini adalah melakukan suatu kesalahan dan boleh, apabila disabitkan, dikenakan hukuman yang diperuntukkan dalam seksyen 10A (5)."

Pindaan bagi
Jadual
Kedua.

6. Jadual Kedua kepada Akta itu adalah dipinda dengan memasukkan perenggan 4A yang berikut selepas perenggan 4—

“4A. (1) Walau apapun peruntukan-peruntukan perenggan 4, Lembaga boleh, menurut seksyen 4 (4), memohon untuk didaftarkan sebagai suatu syarikat di bawah Akta Syarikat 1965 sesuatu perbadanan yang telah ditubuhkan di bawah seksyen 4 (3) (a) tanpa mengulung dan membubarkan perbadanan itu terlebih dahulu.

(2) Pada memohon didaftarkan sedemikian sesuatu perbadanan sebagai suatu syarikat, Lembaga hendaklah mematuhi peruntukan-peruntukan Akta Syarikat 1965, dan peruntukan-peruntukan Akta ini tidak boleh ditafsirkan sebagai mengurangkan kuasa-kuasa Pendaftaran Syarikat di bawah Akta itu.

(3) Apabila sesuatu perbadanan didaftarkan sebagai suatu syarikat di bawah Akta Syarikat 1965, perbadanan itu hendaklah disifatkan sebagai dibubarkan, dan—

(a) semua kuasa, hak, keistimewaan, kewajipan atau tanggungan yang sebelum sahaja pendaftaran adalah kuasa, hak, keistimewaan, kewajipan atau tanggungan perbadanan itu hendaklah turun kepada syarikat itu; *

(b) semua aset dan harta alih dan harta takalih yang sebelum sahaja pendaftaran telah diletakkan pada perbadanan itu atau pada mana-mana orang yang bertindak bagi pihak perbadanan itu hendaklah, walau apapun peruntukan perenggan 4 (2), terletak pada syarikat tanpa apa-apa pindahhak, serahak atau pindahmilik dan syarikat itu hendaklah, berkenaan dengan semua harta takalih, memohon kepada pihakberkuasa pendaftaran yang berkenaan untuk dibuat suatu catitan yang bermaksud demikian itu;

(c) semua suratikatan, bon, perjanjian, suratcara dan perkiraan kerja yang ada sebelum sahaja pendaftaran bagi faedah atau terhadap perbadanan itu hendaklah berkuatkuasa dan berkesan sepenuhnya bagi faedah atau terhadap syarikat itu dan boleh dikuatkuasakan dengan sepenuh dan berkesan seolah-olah syarikat itu, bukannya

perbadanan itu atau mana-mana orang yang bertindak bagi pihak perbadanan itu, telah dinamakan atau menjadi satu pihak di dalamnya; dan

(d) apa-apa langkah pembicaraan, samada sivil atau jenayah atau apa-apa alasan tindakan yang belum selesai atau yang sedia ada sebelum sahaja pendaftaran oleh atau terhadap perbadanan itu atau oleh atau terhadap mana-mana orang yang bertindak bagi pihak perbadanan itu boleh diteruskan atau dibawa oleh atau terhadap syarikat itu sebagaimana ia mungkin telah diteruskan atau dibawa oleh atau terhadap perbadanan itu.

(4) Jika timbul apa-apa kesulitan atau anamoli berkenaan dengan peruntukan-peruntukan peralihan yang terkandung dalam perenggan ini, Menteri boleh, selepas berunding dengan Menteri yang bertanggungjawab atas syarikat-syarikat, dengan perintah membuat apa-apa ubahsuaian yang pada pendapatnya adalah perlu bagi menghapus, menyelesaikan atau mengelakkan kesulitan atau anamoli itu tetapi Menteri tidak boleh menjalankan kuasa-kuasa yang diberi di bawah perenggan-kecil ini selepas tamat tempoh dua tahun dari pendaftaran sesuatu perbadanan sebagai suatu syarikat menurut seksyen 4 (4)."

•

•

•

•

•

•

•

•

•

•

•

•

•

•

•

•